

Dada en Seuilla, VIII dias de nouienbre, era de mill et trezientos et sesenta et VIII annos. Yo, Johan Gutierrez, la fiz escreuir por mandado del rey.

CLX

**1330-XII-8, Sevilla. Albalá de Alfonso XI al concejo de Murcia, instruyendo sobre cuestiones referentes a los vasallos de don Juan Manuel, la permanencia de Pedro López de Ayala y la tenencia del castillo de Montegudo. (A.M.M. C.R. 1314-1344, ff. 54 v-55 r y 57v-58r).**

Don Alfonso, por la graçia de Dios, rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Vizcaya et de Molina. Al conçejo de la çibdat de Murçia, salut et graçia.

Sepades que vi vuestra carta que me enbiastes con Pedro Gras et con Diego Martinez de Ferrerueta, vuestros mandaderos.

Et a lo que me enbiastes dezir que don Johan, fijo del infante don Manuel, nin sus vasallos nin sus acostados que fuese la mi merçed que non entrasen en Murçia, quanto esto yo lo fare en tal manera que el mio seruiçio sea guardado et vosotros eso mesmo.

Et otrosy, a lo que me enbiastes pedir por merçed que yo que fiziese merçed a Pedro Lopez de Ayala en manera que podiese fincar y et guardar mio seruiçio, çiertos seed que tales son los seruiçios que Pedro Lopez me a fecho que mi talante es de le fazer merçed.

Et otrosy, a lo que me enbiastes dezir que Garçia Jufre de Lison o Jordan Perez de Rufas, que esta y por el en el mio castiello de Montagudo, que uos fazia muchos males et dannos et que me pediades merçed que lo mandase escarmenatar, sabed que yo enbio mandar a los dichos Garçia Jufre et Jordan Perez que uos non fagan mal nin danno, nin uos prenden nin uos tomen ninguna cosa de lo vuestro, et lo que uos an prendado et tomado que uos lo tornen. Et demas, yo porne y otro alcaide tal que guarde muy bien mio seruiçio et a uosotros de danno.

Dada en Seuilla, ocho dias de dezienbre, era de mill et trezientos et sesenta et VIIIº annos. Yo, Diego Perez, de la camara, la fiz escreuir por mandado del rey.

